

08/05/1998

Pendatang patut hormat Malaysia

Nasat Amri

KEHADIRAN rakyat Indonesia di Malaysia, khususnya yang disebut pendatang tanpa izin yang mencari pekerjaan di Malaysia adalah untuk mencari rezeki, bermodalkan tulang empat kerat sama ada lelaki mahupun wanita.

Pendatang lelaki bekerja sebagai buruh ladang dan binaan manakala wanita kebanyakannya sebagai pembantu rumah dan pelayan atau tukang masak di restoran, pekerja kilang dan ada segelintir kecil yang bekerja di lain sektor.

Ini disebabkan di negara asal mereka sendiri tidak ada peluang pekerjaan (banyak pengangguran). Untuk sampai ke negara ini, ramai juga yang menemui ajal akibat bot yang mereka naiki karam, ada yang dilanggar kapal dan terlanggar batu karang serta dipukul ombak besar.

Kerajaan Malaysia yang dipimpin oleh Datuk Seri Dr Mahathir Mohamad, seorang pemimpin dan negarawan yang berjiwa besar, tinggi rasa kemanusiaannya menerima mereka (pendatang tanpa izin) ini dengan mengeluarkan surat kebenaran (permit kerja sementara).

Ini untuk membolehkan mereka dapat bekerja di dalam suasana aman dan terjaga keselamatan dengan memberikan segala kemudahan dan layanan yang baik atas dasar perikemanusiaan dan rasa persaudaraan serumpun serta sejabat. Terima kasih kepada pemimpin Malaysia.

Namun kini Malaysia dan rantau ini dilanda krisis ekonomi maka terpaksa mereka yang sebagai pendatang tanpa izin ini dihantar pulang ke negara asal mereka.

Kita tahu satu rusuhan berlaku di Kem Tahanan Semenyih, Negeri Sembilan baru-baru ini. Untuk membela diri dari serangan perusuh tahanan di kem itu, polis terpaksa melepaskan tembakan sehingga ada pendatang tanpa izin Indonesia berketurunan Aceh terkorban. Dalam hal ini media asing cuba membesar-besarkan peristiwa ini dengan memburuk-burukkan Kerajaan Malaysia.

Saya mengamati serta berpandangan seterusnya menilai, bahawa kerajaan Malaysia cukup prihatin, bertolak ansur dengan memberi layanan wajar secara kemanusiaan dengan memikul beban kesusahan menjaga mereka. Selanjutnya menghantar pulang dengan mengeluarkan kos (biaya) yang tidak sedikit.

Dilakukan ini semua atas dasar menjaga hubungan baik dan persaudaraan serumpun, seagama dan serantau. Tolak ansur yang tinggi yang dilakukan oleh kerajaan Malaysia ini patut dihormati dan dikenang khususnya oleh rakyat Indonesia yang ada di sini (Malaysia) sama ada yang masih menjadi tenaga pekerja mahupun yang menjadi penduduk negara ini.

Sebagaimana yang dikatakan oleh Ketua Polis Negara, Tan Sri Rahim Noor, rakyat Indonesia dan rakyat Malaysia kita serumpun mempunyai budaya dan adat resam yang sama terutama memahami pepatah 'di mana bumi dipijak di situ langit dijunjung'. Kita tidak mahu memijak bumi ini (Malaysia) menjunjung langit yang lain kita hormat kata-kata beliau ini.